



Campionadi plein tensiun


Biebei 80 parasguladras e parasguladers semesiran a Mustér al campiadadi svizzer

DA HANS HUONDER / ANR

■ **Quest'jamna semesiran las meglieras parasguladras ed ils meglers parasguladers dalla Svizra a Mustér. Las cundiziuns da sgol d'entochen ussa ein stadas fetg bunas.** Il campiadadi svizzer ei in ulteriur arranschament pli grond che vegn organisau dils Surselva Flaigers en collaboraziun cun l'Unìon Disentis Open e cun sustegn da Vol Liber Grischun. Sper plirs campiadadis svizzers ei quei stau ils davos onns era concurrenz dal Cup mund-

ial da parasgular. Ch'ils responsabels pil sport da parasgular en Svizra vegnan adina puspei en Surselva per lur concurrenz naziunalas ed internaziunalas ha differents motivs. «Tier nus ein las cundiziuns da sgular optimalas e quei levgiescha naturalmein l'organisaziun sco tala», di *Marc Demont* da Mustér che presidescha il club dapi treis onns. La regiun ha in bien num per sias pusseivladads da sgol cumbinadas cun bia variaziun e selecziun. Da cheu an-

ora ein sgols denter 50 e 120 km pusseivels. Dapi la dumengia bat-tan las meglieras Svizzras ed ils meglers Svizzers per arbagias. Las cundiziuns d'entochen ussa ein stadas bunas ed ils organisaturs han stuiu nudar suletamein pigns incaps. Fertion che la concurrenza dallas damas para d'esser decidida, han aunc plirs participants la pusseivladad d'acquistar il tetel tiels umens.



Parasguladers el tschiel dalla Surselva. Quest'jamna ha liug cheu il campiadadi svizzer.

FOTO M. SCHEEL



Parasguladras e parasguladers en concorrenza.

FOTOS M. SCHEEL

Ell'enzenna dil parasgular

Bunas cundiziuns ils emprems dis dil campiunadi da parasgular a Mustér

DA HANS HUONDER / ANR

■ Dapi la dumengia semesiran las meglieras parasguladras ed ils megliers parasguladers dalla Svizra sisum la Surselva. Sco quei ch'ils organisaturs constateschan, ei il campiunadi svizzer d'uonn signaus da bia tensiun. Entochen il mardis sera havevan 80 pilots absolviu treis tasks, vul dir pensums. Suentar haver gudignau tuttas concorrenzas d'entochen lu ei *Yael Margelisch* da Verbier la clara favorita pil tetel da campiunessa svizra. Tiels umens ei la

concorrenza aunc buca decidida. Victor dil tierz task ei *Stephan Morgenthaler* da Staffelbach staus.

La dretga tactica

Normalmein gudogna quella e quel che sgola davontier. Che quei ei buca adina aschia muossa *Tim Bollinger*: «Jeu hael vii ch'ils pilots davon mei havevan problems cun la termica ed aschia sundel jeu sedecidius per in'autra ruta.» Quei ei lu era sepagau aschia ch'el ha gudignau igl emprem pensum, quel dalla dumengia. Già il secund di da concorrenza ha *Mi-*

chael Maurer da Frutigen mussau sias ambiziuns. El ha victorisau a moda suverana. «La concorrenza ei fetg gronda, ils pensums ein fixai bein ed ein interessants», constateschan plirs participonts. Il tierz task, quel dil mardis, ei allura vegnius gudignaus da *Stephan Morgenthaler*: «Jeu sundel staus plitost resalvaus en miu sgol e hael schau la preferenza als auters. Aschia hael jeu cattau la megliera termica.» Sco quei ch'ils organisaturs constateschan, ei la concorrenza tiels umens uonn fetg uliva, forse aschi fetg



sco aunc mai. Ils victurs tiels umens vegnan erui ellas davosas concurrenzas da quels dis. Egl emprem tierz dalla rangaziun ein tuts concurrents fetg datier in da l'auter. Tier las damas vegna *Nanda Waliser* da Leissigen a daventar secunda davos Yael Margelisch. Il tierz rang occupa il mument *Gabriella Mettler*. Il menader tecnic dil campinadi svizzer, *Martin Scheel*, ei fetg cuntents cul decuors dallas concurrenzas d'entochen ussa e las participontas ed ils participonts ein plein laud per la lavur dallas organisaturas e dils organisateurs. Ils emprems dis da concurrenza ha ei dau singuls incaps pli pigns. Aschia ei in parasgularer curdaus e ha pendiu ora ina schuiala.

Per in'ulteriura ga a Mustér

Campinadis e concurrenzas da parasgular ein buca enzatgei niev sisum la Surselva. Dapli plirs onns organischan ils Surselva Flaigers tals arranschaments naziunals ed internaziunals en collaboraziun cun l'Uniun Disentis

Open e cun sustegn da Vol Liber Grischun, medemamein in'uniun da parasgularas e parasguladers. Al campinadi svizzer d'uonn semesiran rodund 80 parasgularas e parasguladers, per part era digl exteriur. Quels nezegian la caschun da semesirar cun Svizras e Svizzers che s'audan il mument denter ils meglers dil mund. Il club dils parasguladers Surselva Flaigers che dumbra biebein 40 commembras e commembres ei s'establiu ell'organisaziun da concurrenzas. Ils arranschaments purschi regularmeins ils davos onns han era dau dabia rutina als organisateurs. Quei san ils responsabels sin plaun naziunal e per quei motiv vegn la regiun dalla Surselva lu adina puspei era risguardada per concurrenzas. Mo buca mo quei: Las cundiziuns da sgular ein optimalas en Surselva ed en regiuns cunfinontas per exempel entochen en Portenza. Quellas premissas levgieschan naturalmeins l'organisaziun sco tala. La regiun

ha in excellent num per sias pusseivladads da sgol cumbinadas cun bia variaziun e selecziun. Igl onn vargau han ils Surselva Flaigers e l'Uniun Disentis Open saviu encorunar lur grondas stentas d'organisar arranschaments da parasgular. Lu ha numnadameins giu liug per la secunda ga sisum la Surselva in dallas tschun concurrenzas dil Cup mundial. 130 parasgularas e parasguladers digl entir mund eran separticipai a quei arranchament internaziunal. Al campinadi che ha liug quest'jamna partan las participontas ed ils participonts mintgamai a Gendusas. Da leu anora han els d'absolver differents sgols cun pensums. Per ordinari han ils sgols ina distanza da 50 entochen 120 kilometers. Rodund 30 persunas dallas treis uniuns garanteschon in bien andament da quei campinadi svizzer. Sper glieud occupada ell'organisaziun sco tala ei quei denter auter era persunas scoladas els fatgs samaritans ni dil seracass.



Arrivada dinamica a Mustér/Sax.




In survesta dalla cuntrada ch'ins ha schiglioc buca.



Il tschiel sur Mustér plein parisols e colurs.



80 parasguladras e parasguladers semesiran il mument a Mustér.



Tgeinin ha la megliera termica?



In maletg fascinont dalla cuntrada cun in parasgulader.